



Fasnacht 2016

Sujet: S`MAFI(F)A- THEATER

„Liebi Lüt vo Prattele, Fränkedorf und Muttenz
do spricht die bekanntischi Fuessball- Prominänz
oder besser gsait dr gröschi Depp
darf ich vorstelle mi Name isch Blatter Sepp.

Ihr wüsst momentan bini nit so zwäg
drum bini froh uf dem Wäg
euch mini Unschuld chönne z`bewiese
und Nei d`FIFA het sicher kei Krise.

De Vorwurf ich würdi beschtäche
find ich selber es grosses Verbräche
ich due mi vo sonere Tat schütze
will eifach gärn armi Länder unterstütze.

Das mach ich, dr Blatter scho sit eh und jeh
dass chamme scho bi minere erste Wahl gseh
scho damals het mi das Couvert verteile quält
aber als Dank wird ich jo als Präsident gwählt.

Au mi liebe Fründ dr Kaiser Franz
macht so mänge heisse Tanz
het welle d`WM 2006 für sini Schwobe
dass cha ich natürlich numme lobe
drum will sich dr Franz au nit blamiere
duet schnell bi mir 10 Milliönli investiere.

Au dr Putin isch nit anders gstrickt
het mir es paar Fläsche Wodka gschickt
als Gegeleischtig dass isch halt so
händ d`Russe d`WM 2000 und 18 becho.

Mi Mercedes muess nümm an e Tankstell fahre
ich tank dehei vorem Huus mi Charre
ha e eigeni Pipeline dass isch klar
zu mir ins Wallis direkt vo Katar
ihr händ jetzt sicher alli dänkt
wieso wird dem Blatter so öbis gschänkt
de Fall isch klar, es merkt jedi Pflute
dank mir chamme im 2022 im Winter schutte.

Aber ich muess säge es isch nit eifach
will das Schmiere isch scho e heikli Sach
alli Mitwüsser müesse ufs Muul hocke
keine darf ufmotze oder bocke
wenn den doch mol Eine duet singe
müesse siebe Funktionäre über d` Klinge springe.

Aber irgendwie bini ane Wand gfahre
drum gits im Septämber es Ermittlungsverfahre
dr Hauptsitz wird usenander gno
einigi Funktionäre wärde intensiv verno
die ganz FIFA duet nümm so glänze
stoost mit ihrer Sympathie an d` Gränze
d` Sponsore si langsam nümmi froh
zwei händ das sinkende Schiff bereits verlo
gönd no me chann ich nümm strahle
wer soll mir den mi Löhnli zahle.

Den am 8. Oktober isch dr Kessel gflickt
ich dr Blatter wird in d` Wüeschti gschickt
für 90 Täg wird ich suspendiert
dass isch mir in minere Karriere nonie passiert
dass chann ich uf kei Fall so lo stoh
drum han ich dr Michel Platini au mitgno.

Den kurz vor Wiehnacht hoppla
chumm ich nomol so richtig dra
wäge Amtsmisbruch das het mi geehrt
wird ich für ganzi 8 Jöörli gesperrt
es haut mi um wie es chleins Chind
drum han ich au es Pflaschter a mim Grind.

Ihr werdet sicher alli verstoh
das ich gege das Urteil in Beruefig wird go
mini Chance si zwar ziemlich chli
und d` FIFA Wält isch gli verbi
will Zyt isch do ab mim Thron z` stiege
und alles numme wägere grosse Intrige
ich wills zum leschte Mol ehrlich versueche
sag vielmols Dankeschön de Dorfplatzrueche
das sie mir d` Möglichkeit händ geh
uf ihrem Wagezettel Stellig z` neh.

Ans d` Komitee e Tipp, en banale
dere Clique müender keini Subventionen zahle
will ich bi jo grosszügig dass isch bewiese
ha ihne us mim Portokässeli öbis überwiese
jetzt wünsch ich allne e tolli Fasnacht mit Pepp
es grüsst dr ex FIFA Präsi - dr Blatter Sepp.“

Uf dr andere Site hän dir dr original Textsch vom Sepp Blatter

